



ԱՆԱՀԻՏ ԱՆՏՈՆՅԱՆ

ՈՐՎ Է ՍՈՒՐԲ ՈՍԿՅԱՆՅ ԵՒ ՍՈՒՐԲ ՍՈՒՔԻԱՍՅԱՆՅ
ՎԿԱՅԱԲԱՆՈՒԹՅՈՒՆՆԵՐՈՒՄ ՀԻՇՎԱԾ ՀԱՅՈՑ ԱՐՏԱՇԵՍ ԹԱԳԱՎՈՐԸ,
ԵՒ ՈՎՔԵՐ՝ ՆՐԱ ՈՐԴԻՆԵՐԸ

Սկիզբը՝ 2021 թ. Թ. համառում

ՈՐՈՇ ԺԱՄԱՆԱԿԱԳՐՈՒԹՅՈՒՆ

Մովսես Խորենացու (եւ հիմնականում այլ հայ պատմիչների) ժամանակագրությամբ Տիրան թագավորն իշխել է 130–150 թթ., նրան հաջորդած Տիգրանը (Սոհեմոս)՝ 150–191 թթ.՝ ընդմիջումով պարթևահռոմեական պատերազմի ժամանակ¹:

Նայելով գահատարիներին՝ հարց է առաջանում, թե ինչ հանգամանքներում է շուրջ 10-ամյակ գահակալած Տիրանը թագ ստացել Անտոնինոս կայսրից, ինչպես պատմում է Սուքիասյանց վկայաբանությունը: Միքայել Չամչյանը կարծում է, որ Տիրան թագավորը 138 թ. անհրաժեշտություն է ունեցել վերանորոգելու դաշինքը Հռոմի հետ, որտեղ գահ էր բարձրացել նոր կայսրը՝ Անտոնինոս Պիոսը (138–161 թթ.)²: Խոսքը Տիրանի հայր Արտաշեսի եւ Տրայանոս կայսեր (98–117 թթ.) միջեւ հաստատված դաշինքի մասին է, որին կանգրադառնանք իր տեղում: Նոր գահակալած Անտոնինոս կայսրին Տիրանը հավաստիացրել է Հռոմին Հայաստանի հավատարմության հարցում, ինչն առիթ է դարձել, որ պար-

¹ Մ. Չամչյանի վերականգնումով՝ Տիրանն իշխել է 131–152 թթ., Տիգրանը՝ 152–193 թթ. (տե՛ս Մ. ՎՐԳ. ՉԱՄՉԵԱՆ, Հայոց պատմություն, հտ. Ա., Վենետիկ, 1784, էջ 353–357, հտ. Գ., Վենետիկ, 1786, «Ժամանակագրություն», էջ 43–44): Լ. Շահինյանի վերականգնումով՝ Տիրանն իշխել է 128–149 թթ., Տիգրանը՝ 149–191 թթ. (տե՛ս «Մովսես Խորենացի. պատմություն եւ ժամանակագրություն», Երեւան, 1988, էջ 201. նույն հեղինակի՝ «Հայաստանը եւ առաջին Արշակունիները», Երեւան, 1993, էջ 195 եւ 406, 409 էջերի աղյուսակները):

² Տե՛ս Մ. ՎՐԳ. ՉԱՄՉԵԱՆ, Հայոց պատմություն, հտ. Ա., էջ 353–354:

Թեւական Պերոզ Թագավորն արշավի Հայաստան: Սուբիասյանց վկայաբանության տեղեկությունն այն մասին, որ ճգնակյաց սրբերն աղոթում էին նեղության մեջ հայտնված ժողովրդի համար, թույլ է տալիս մտածել, որ պարթեւ Թագավորը նախնական հաջողություններ է ունեցել եւ մեծ վտանգ ներկայացրել Հայաստանի համար: Այդպիսի իրավիճակում արշավանքի դադարեցումը կայսեր նամակով եւ սպառնալիքով, ինչպես եւ մինչ այդ հայոց գահին Տիրանի իշխանության ճանաչումն ու նրան թագ եւ ծիրանի ուղարկելը՝ Հռոմի կողմից ներկայացվել են իբրեւ թագավորի շնորհում Հայաստանին եւ արտահայտվել Հռոմի նոր գահակալի 140–143 թթ. դրամներում:

Սուբիասյանց սրբերը, այսպիսով, ողջ էին Տիրան Թագավորի ժամանակ՝ 140 թ. պարթեւական արշավանքի ընթացքում: Արշավանքի հեղինակ պարթեւական Թագավոր Վաղարշ Բ.-ին է (105–147 թթ.) վկայաբանությունը՝ բացատրելով, որ Պերոզ նշանակում է հաղթող: Նույն իմաստն ունեցել է պահլավերենում, պարսկերենում, հավասարազոր է հունարեն Նիկատոր, լատիներեն Վիկտոր³ անուններին, որոնք կիրառվել են ինչպես իբրեւ պատվանուն, այնպես եւ՝ անձնանուն:

Պերոզ Թագավորի գահատարիներով Մովսես Խորենացին մատնանշում է Արտաշես Թագավորի որդիներ Տիրանի եւ Տիգրանի գահ բարձրանալու տարեթվերը: Երկրորդ գրքի ԿԲ. եւ ԿԴ. գլուխներում պատմիչն ասում է, որ Տիրանը գահակալեց պարսից առաջին Պերոզի իշխանության 3-րդ, իսկ Տիգրանը՝ 24-րդ տարում⁴: Վաղարշ Բ. Պերոզի 1-ին տարին Մովսես Խորենացին (եւ հայ պատմիչները) ճանաչում են 128 թ. եւ ոչ 105 թ., ինչպես ընդունված է՝ համաձայն այս Թագավորի դրամների: Այս հարցում եւս Սուբիասյանց վկայաբանությունը հստակություն է բերում:

Այսպես՝ Սուբիասյանց վկայաբանությունը հաղորդում է, որ երբ մահացավ հայոց Արտաշես Թագավորը, մահացավ նաեւ պարսից Թագավորը՝ «պարսից Արտաշեսը», եւ գահակալեց Պերոզը, այսինքն՝ Վաղարշ Բ.-ն: Վերջինս, ըստ դրամների, միաժամանակ իշխել է սկզբում Բակուր Բ.-ի

³ Տէն Հ.Ր. ԱՃԱՌԵԱՆ, Հայոց անձնանունների բառարան, հտ. Դ., Երեւան, 1948, էջ 262:

⁴ Տէն ՄՈՎՍԷՍ ԽՈՐԵՆԱՅԵ, Պատմութիւն Հայոց, գք. Բ., գլ. ԿԲ. եւ ԿԴ., Տիգրիս, 1913, էջ 193 եւ 196, աշխ.՝ Երեւան, 1990, էջ 125 եւ 127: Մովսես Խորենացու բնագրում 24-րդի փոխարեն 4-րդ է, որը ուսումնասիրողները, ընդօրինակման սխալ համարելով, ուղղում են 24-րդ, քանի որ նախորդած Տիրանը, գահակալելով նույն Թագավորի 3-րդ տարում, իշխել է 21 տարի:

(78–116 կամ 105 թթ.), Արտավան Դ.-ի (80–88 կամ 90 թթ.), 109 թվականից՝ նաեւ հոսսրով Ա.-ի (109–128/129 թթ.) հետ: Երկար ժամանակ վիճարկելով իշխանությունը գահակիցների հետ եւ իշխելով միայն երկրի մի մասի վրա՝ Վաղարշ Բ. Պերոզը հոսսրով Ա.-ի մահից հետո՝ 128/129 թթ., իշխել է պաշտոնապես՝ մինչեւ մահը գահակից լինելով Միհրդատ Դ.-ին (128/129–147 թթ.)⁵: Նշանակում է՝ հայոց Արտաշեսի հետ միաժամանակ մահացած «պարսից Արտաշեսը» հոսսրով Ա.-ն է, եւ նրանք, ըստ հոսսրով Ա.-ի դրամների, մահացել են 128 կամ 129 թ.:

Հայոց Արտաշես թագավորի մահվան նույն թվականն է ցույց տալիս Մովսես Խորենացին, այն է՝ Արտաշես թագավորը գահակալել է Աբգարի 38, Սանատրուկի 30, Երվանդի 20 տարի գահակալություններից հետո, իսկ Աբգարի իշխանության 2-րդ տարում Օգոստոս կայսեր մարդահամարն էր, երբ ծնվեց մեր Տեր Հիսուս Քրիստոս: Ուրեմն՝ հայոց Արտաշեսը գահ է բարձրացել 87 թ. եւ իշխելով 41 տարի՝ մահացել 128 թ.⁶: Փաստորեն հայկական աղբյուրները ցույց են տալիս Վաղարշ Բ. Պերոզի ոչ թե ինքնահռչակ իշխանության եւ գահակալական պայքարի տարիները, այլ պաշտոնական գահակալության տարին՝ 128 կամ 129 թվականը: Մինչ այդ նա կարող էր օրինական գահակալ չդիտվել: Հակառակ այն իրողության, որ նա դրամ է հատել մինչ 128 թ., պարսից մատյաններում, որոնցից օգտվել է Մովսես Խորենացին⁷, ինչպես եւ իր ժամանակին Հայաստանում, երբ գրվել է վկայաբանությունը, Վաղարշ Բ.-ի իշխանության առաջին տարին ճանաչվել է նրա պաշտոնական գահակալության 128/129 թ.: Մի իրողություն նույնպես կարող է հավաստել, որ Վաղարշ Բ. Պերոզը մինչ 128 թ. պաշտոնապես չի գահակալել: Այս թագավորը, որը բնութագրվում է Հռոմի նկատմամբ անհաշտ վերաբերմունքով, Պարթևական տերության դեմ Տրայանոս կայսեր (98–117 թթ.) արշավանքի ժամանակ զարմանալիորեն հիշված չէ: Եթե նա անգամ 105 թվականից

⁵ Պարթևական թագավոր Վաղարշ Բ.-ն դիտված է նաեւ որպես Վաղարշ Գ., վերջինս՝ Վաղարշ Դ. (տես Յ. Վրդ. ՏԱՇԵԱՆ, Արշակունի դրամներ, Վիեննա, 1917, էջ 116–140. Н. ДИБ-ВОЙЗ, Политическая история Парфии, СПб, 2008, էջ 193–194, 204–205. Parthia.com կայքում՝ http://www.parthia.com/parthia_rulers.htm եւ http://www.parthia.com/parthia_chrono.htm):

⁶ Տես Լ. ՇԱՀԻՆՅԱՆ, Մովսես Խորենացի. պատմություն եւ ժամանակագրություն, էջ 201. նույն հեղինակի՝ «Հայաստանը եւ առաջին Արշակունիները», էջ 406: Արտաշեսի գահակալությունը 1 տարի տարբերությամբ՝ 88–129 թթ. է տեղադրում Մ. Չամչյանը (տես «Հայոց պատմություն», հտ. Ա., էջ 339–351 եւ հտ. Գ., «Ժամանակագրություն», էջ 42–43):

⁷ Տես ՄՈՎՍԵՍ ԽՈՐԵՆԱՅԻ, Պատմություն Հայոց, գք. Բ., գլ. ԽԸ., 1913, էջ 176, աշխ.՝ 1990, էջ 112:

է գահին (ինչպես որոշ դեպքերում է ճանաչվում՝ նախորդ տարիների դրամներն այլոց հատկացնելով), 115—117 թթ. նա մեկ տասնամյակ արդեն գահակալում է, սակայն թագավորության ռմ մասում, եթե հռոմեական զորքերը հասել են մինչեւ Բաբելոն, Սելեւկիա եւ մայրաքաղաք Կտեսսիփոն (Տիգրոն), իսկ նրա մասին հիշատակություն չկա, նա հռոմեացիներին դիմադրողների շարքում չէ։ Իբրեւ ընդդիմացողներ՝ հիշատակված են Խոսրով Ա.-ն, Միհրդատը (ենթադրվում է՝ Խոսրով Ա.-ի եղբայրը), նրանց որդիները։ Հայկական աղբյուրները, այսպիսով, ճիշտ են ցույց տալիս, որ նա պաշտոնապես գահակալել է Խոսրով Ա.-ի մահից հետո։

Նկատի առնենք նաեւ, որ եթե պարսից Խոսրով Ա.-ի մահվան տարին մեկ կամ երկու տարի տարբեր լիներ 128/129 թվականից, որն այսօր ընդունված տարեթիվն է, կամ Մովսես Խորենացու ժամանակագրությունն ինչ-ինչ պատճառով մեկ-երկու տարի տարբեր հաշվարկվի, որեւէ բան չի փոխվում. հասկանալի է, որ Սուրիասյանց վկայաբանության նշումը, թե հայոց Արտաշեսի հետ միաժամանակ մահացավ պարսից թագավորը, եւ գահակալեց Պերոզը, ենթադրել է տալիս նույն կամ մոտակա տարին։ Սակայն փաստն այն է, որ դրանք համընկնում են։ Մովսես Խորենացու ժամանակագրությամբ ոչ միայն Խոսրով Ա.-ի (ըստ պատմահոր եւ Սուրիասյանց վկայաբանության՝ պարսից Արտաշեսի) մահվան, այլեւ գահակալության սկիզբն է համընկնում այսօր պատմագիտության ընդունած տարեթիվին (109 թ.)։ Համաձայն Մովսես Խորենացու՝ պարսից Արշավիր թագավորի 20-րդ տարում գահ է բարձրացել հայոց Աբգար թագավորը, իսկ Աբգարի 2-րդ տարին 1 թ. է։ Ուրեմն՝ 1 թվականը պարսից Արշավիրի 21-րդ տարին է։ Նա կառավարել է 46 տարի, ուրեմն՝ ներառյալ մինչեւ Ք. հ. 26 թվականը։ Հաջորդ չորս արքաներն են Արտաշեսը՝ 34, Դարեհը՝ 30, Արշակը՝ 19, Արտաշեսը՝ 20 տարի գահակալմամբ։ Վերջինիս, այսինքն՝ Արտաշես-Խոսրով Ա.-ի 1-ին տարին կլինի 26, 34, 30, 19 տարիների գումարը՝ 109 թ., եւ մահը՝ 20 տարի անց՝ 128 կամ 129 թ.։

Այս համապատասխանությունը շատ արժեքավոր է։ Հայտնի է, որ պարթևական թագավորների վերաբերյալ Մովսես Խորենացու մատուցած անվանացանկն ու գահատարիները զգալի տարբերություն ունեն գրավոր այլ աղբյուրներով, բայց հիմնականում պարթևական դրամներով վերականգնվող պատկերի հետ։ Որպես պատճառ, հավանաբար, պետք է դիտել նաեւ պարագաները, թե ո՞ւմ են ընդունել օրինական գահակալ, կենսագրության ո՞ր պահից են ճանաչել գահակալումը եւ ի՞նչ

անունով են ճանաչել տվյալ թագավորին: Վաղարշ Բ. Պերոզը, օրինակ, ըստ Մովսես Խորենացու, մահացել է 161/162 թթ. եւ ոչ 147-ին, ինչպես ճանաչվում է ըստ նրա եւ որդու դրամների: Բայց չէ՞ որ չի բացառվում, որ որդին՝ Վաղարշ Գ.-ն, կարող էր գահակից լինել հորը, եւ ինքը նույնպես դրամ հատել հոր գահակալության օրոք՝ առավել եւս նրա ծերության շրջանում՝ իբրեւ փաստական կառավարող:

Իրապես, չի կարելի խոստն չհամարել, որ Մովսես Խորենացու ներկայացրած է՛ հայոց, է՛ պարթեւ թագավորների շարքով հաշվելով՝ հայոց թագավոր Արտաշեսը եւ պարսից թագավոր Խոսրով Ա.-ն (պարսից Արտաշեսը՝ ըստ Սուքիասյանց վկայաբանության եւ հայ մատենագրության) միաժամանակ են մահացել, ինչպես առանց որեւէ տարեթիվ կամ ժամանակագրություն ներկայացնելու հայտնում է վկայաբանությունը՝ լինելով ավելի վաղ գրված եւ անկախ հայ պատմիչներից:

Վերելում ասացինք, որ Անտոնինոս Պիոս կայսեր կողմից Տիրանին թագ ուղարկելու եւ Վաղարշ Բ. Պերոզի՝ դեպի Հայաստան ձեռնարկած արշավանքի մասին հայ պատմիչները չեն հիշատակում: Միայն Սամուել Անեցին (ԺԲ. դար) իր ժամանակագրության մեջ 148 թ. ներքո ունի նշում՝ Վաղարշ, որ Պերոզ կոչվեց Հռոմի վրա հարձակվելու համար: Նույն բացատրությամբ (Պերոզ կոչվեց Հռոմի վրա հարձակվելու համար) 164 թ. ներքո նշված է նաեւ Վաղարշ Գ.-ն⁸: Երկրորդ դեպքում նկատի է առնված 161—166 թթ. պարթեւահռոմեական պատերազմը, իսկ 148 թ. ներքո, կարծում ենք, որ Սամուել Անեցու կողմից նշված է Սուքիասյանց վկայաբանության հիշած արշավանքը: Արշավանքների տարեթիվերը պատմիչը մի քանի տարի հետո է ցույց տալիս: Պետք է նկատի ունենալ, սակայն, որ տարեթիվերը պատմիչի վերականգնածն են: Հայտնի է, որ Սամուել Անեցին առաջինն է հայ պատմիչներից, որ աղբյուրներում եղած ժամանակագրական հաղորդումները՝ սկսած Քրիստոսի Սուրբ Ծննդյան 1 թ., վերածել է տարեթիվերի: Եւ եթե հաշվի առնենք, որ Անտոնինոս Պիոս կայսեր մահից հետո՝ 161 թ., Վաղարշ Գ.-ի արշավանքը դեպի Հռոմ պատմիչը ճանաչում է 164 թ., այսինքն, ըստ իր հաշվարկի, իրականից 3 տարի հետո, նույն սկզբունքով 148 թ. ներքո նշած արշավանքը կարող ենք հասկանալ ավելի վաղ տեղի ունեցած՝ ներգաշնակ Անտոնինոս Պիոս կայսեր դրամներին:

⁸ ՏՆՍ ՍԱՄՈՒԷԼ ԱՆԵՑԻ, Հաւաքմունք ի գրոց պատմագրաց, Վաղարշապատ, 1893, էջ 57—58:

Հավանական ենք համարում նաեւ, որ Վաղարշ Բ. Պերոզի արշավանքի համար 148 թվականը Սամուել Անեցին ոչ թե հաշվարկել, այլ ուղղակի վերցրել է Սուրբ Սուքիասյանց վկայաբանությունից: Հնարավոր է, որ սրբերի նահատակության թվականը վկայաբանության իր ունեցած օրինակում նա նշված է տեսել ոչ թե 130 կամ 140, որը (մահվան 2 տարեթիվ), ինչպես վերելում նշեցինք, կարող էր ծագել ընդօրինակողի ունեցած ձեռագրում գրի անհատակությունից, այլ՝ 148 թ., եւ մտածել է, որ եթե նրանք նահատակվել են Վաղարշ Բ. Պերոզի արշավանքից հետո, որի ժամանակ աղոթում էին, ուրեմն արշավանքն էլ այդ տարում է եղել: Բայց վկայաբանությունը չի որոշակիացնում, թե արշավանքից որքան ժամանակ հետո են սրբերը նահատակվել. դա կարող էր տեղի ունենալ նաեւ մի քանի տարի անց: Վկայաբանությունն էլ արշավանքի դադարեցման մասին պատմելուց հետո հիշատակում է, որ սրբերը, իրենց ճգնության լեռից իջնելով, քարոզում էին ժողովրդին⁹: Այսինքն՝ արշավանքը եղել է նրանց նահատակության 148 թվականից տարիներ առաջ՝ 140–143 թթ. միջակայքում:

Վկայաբանության միջոցով բացատրություն ունենք նաեւ, թե ինչու է Սամուել Անեցու գործում Վաղարշ Բ.-ի դեպի Հայաստան արշավանքը նշված որպես Հռոմի դեմ ձեռնարկված: Տիրան թագավորի եւ Անտոնինոս Պիոս կայսեր միջեւ դաշինքի նորոգությունը, կայսեր կողմից Տիրանին թագի շնորհումն առիթ են տվել, որ դեպի Հայաստան արշավանքը հավասարազոր ընկալվի Հռոմի դեմ պատերազմելուն:

Սամուել Անեցին վկայաբանության համաձայն է նաեւ Վաղարշ Բ.-ի վերադիր Պերոզ անունը կապում 140-ականների արշավանքի հետ, երբ դեռ ողջ էին Սուրբ Սուքիասյանք: Եւ դա հակառակ անգամ Մովսես Խորենացու, որը Վաղարշ Բ.-ին Պերոզ անունը տրված է համարում 161–166 թթ. պատերազմն սկսելու առիթով, քանի որ ըստ պատմիչի՝ նախնական հաջողությունից հետո նա մահացել է այդ պատերազմի սկզբում¹⁰: Սամուել Անեցին նույնպես Վաղարշ Բ.-ի մահը հաշվարկել է 162 թ., այսինքն՝ իրականում այդ պատերազմի սկզբում, բայց պատերազմն սկսված է համարել 164 թվականին, քանի որ Անտոնինոս Պիոսի մահվան

⁹ Տէս Մ. ՎՐԳ. ԱԻԳԵՐԵԱՆ, Լիակատար վարք եւ վկայաբանութիւն սրբոց, հտ. Բ., Վենետիկ, 1811, էջ 96–97:

¹⁰ Տէս Մովսէս ԽՈՐԵՆԱՅԻ, Պատմութիւն Հայոց, գք. Բ., գլ. ԿԴ., 1913, էջ 197, աշխ.՝ 1990, էջ 127–128: Սուրբ Սուքիասյանց վկայաբանության մեջ Վաղարշ Բ.-ի Պերոզ անունը ներմուծվել է հետագայում՝ տարբերակելու համար միմյանց հաջորդած պարթևական նույնանուն թագավորներին:

տարին հաշվարկել է 163 թ.: Այս կերպ, այսինքն՝ Վաղարշ Բ.-ի մահը հաշվարկելով 162 թ., իսկ Հռոմի դեմ արշավանքի սկիզբը դնելով 164 թ.՝ նա Պերոզ անունը վերագրել է նաեւ Վաղարշ Գ.-ին:

Այս դիտարկումներով կարող ենք վստահանալ, որ 140-ականների սկզբին՝ Արտաշեսի որդի Տիրանի օրոք, Սուքիասյանք ողջ էին, երբ Վաղարշ Բ.-ն արշավեց դեպի Հայաստան, եւ նահատակվել են 148 թ., եթե իսկապես Սամուել Անեցին այս թվականն է գրանցված տեսել նրանց վկայաբանության մեջ, եւ կամ՝ 150 թ., եթե նրանց ճգնության 44 տարին անխախտ նկատենք եւ հաշվարկենք Ոսկյանց նահատակության 107 թվականից, երբ գահին էր Արտաշեսը:

Այսպիսով՝ Սուրբ Ոսկյանց եւ Սուքիասյանց վկայաբանությունները այլ աղբյուրների հետ ներդաշնակորեն ցույց են տալիս Հայաստանում Ք. հ. Ա.—Բ. դդ. սահմանագծում Արտաշեսի եւ Բ. դ. նրա որդիներին՝ Տիրանի եւ Տիգրանի գահակալությունը:

ԱՐՏԱՇԵՍԻ ՄԱՍԻՆ

Արդի պաշտոնական պատմագիտությունը (նկատի ունենք՝ դպրոցներում եւ բուհերում դասավանդվող) այդ ժամանակահատվածում՝ Ա. դարավերջ — Բ. դարասկիզբ, չի ճանաչում Արտաշես թագավորի, քանի որ, ինչպես նշել ենք հոդվածի սկզբում, սկզբնաղբյուրներից հայտնի հայոց այս արքային, կարելի է ասել, իր ողջ կենսագրությամբ՝ ընտանիքով, գործունեությամբ, տեղափոխում է մոտ 280 տարի առաջ՝ միավորելով Ք. ա. 189—160 թթ. գահակալած Արտաշես Ա.-ի հետ: Ակնհայտ է, սակայն, որ Սաթենիկի հետ Հայաստան եկած եւ այստեղ քրիստոնեություն ընդունած ու նահատակված սրբերը Քրիստոսից առաջ ապրած լինել չէին կարող, նաեւ՝ հռոմեական ու պարթևական գահակալների հետ սկզբնաղբյուրներով ավանդված առնչությունները հնարավոր չեն դարձնում նման տեղափոխումը եւ մեր դիտարկած Արտաշես թագավորի նույնացումը միայն հունահռոմեական պատմիչներից հայտնի Արտաշես Ա.-ի հետ:

Այս տեղափոխման հիմնական պատճառն այն է, որ ԺԹ. դարասկզբից, երբ նոր էին վեր հանվում եւ համադրվում հայոց պատմությանը վերաբերող օտար աղբյուրների, հնագիտության, դրամագիտության եւ այլ տեղեկությունները, անհամատեղման, անհարթությունների դեպքում կասկածի տակ են դրվել հատկապես հայկական սկզբնաղբյուր-

ների տեղեկությունները: Պատմությունամբ բոլոր հետաքրքրվողների հետ երախտապարտ լինելով այն մեծ գիտնականներին, որոնք ասպարեզ են բերել, թարգմանել եւ ներկայացրել են պատմական նյութերը՝ հնարավորություն ընձեռելով մտորել դրանց շուրջ, մեզ հետաքրքրող խնդրում, կարծում ենք, որ օտար աղբյուրների տեղեկությունները ոչ թե մերժում, այլ լրացնում են հայկական աղբյուրները: Արդեն տեսանք, որ Արտաշես թագավորի եւ պարթևական խոսքով Ա. թագավորի համաժամանակյա մահվան մասին վկայաբանության տեղեկությունը համընկնում է պարթև թագավորների դրամների եւ Մովսես Խորենացու ժամանակագրական ցուցումների հետ, Պերոզ Վաղարշ Բ.-ի՝ դեպի Հայաստան ձեռնարկած եւ կայսեր պահանջով դադարեցրած արշավանքի մասին վկայաբանության տեղեկությունը հաստատվում է Կապիտոլինուսի հաղորդմամբ, իսկ Անտոնինոս Պիոս կայսեր դրամները հաստատում են Արտաշեսի որդի Տիրանին թագ եւ ծիրանի տալու մասին վկայաբանության տեղեկությունը: Տեսանք, որ միմյանց չեն հակասում, ընդհակառակը՝ լրացնում են Տիգրանի՝ նույնն է Սոհեմոսի եւ նրա որդիներ Բակուրի եւ Վաղարշի մասին հայկական եւ հունահռոմեական հաղորդումները:

Արտաշես թագավորին՝ իր տիկնոջով, որդիներով եւ գործերով, Ա. — Բ. դդ. սահմանագծում շատ լավ գիտեն հայոց պատմիչները, գիտեն առավել, քան վաղ շրջանի հայոց ցանկացած արքայի մասին: Նրա մասին առավել ընդարձակ պատմում է Մովսես Խորենացին «Հայոց պատմության» երկրորդ գրքի ԼԷ. գլխից մինչեւ Կ.՝ ամբողջ 24 գլուխներում, իսկ նրա գահակալած որդիների մասին՝ նույն գրքի ԿԱ. — ԿԴ. գլուխներում¹¹: Երկրորդ գրքի ԽԸ. գլխի վերջում պատմիչն ասում է, որ Արտաշես թագավորի, նրա նախորդի՝ Երվանդի մասին շարադրում է՝ սկզբնաղբյուր ունենալով մեհենական պատմությունների հեղինակ Ողյումպ քուրմին, պարսից մատյանները՝ նշելով, որ դրանց ձայնակից են նաեւ վիպասանների երգերը: Ընդգծենք, որ վիպասանների երգերը, նաեւ Արտաշեսի ու Սաթենիկի հարսանիքին նվիրված երգ-գրույցը, ինչպես եւ նրանց որդի Արտավազդի մասին առասպելապատումը Մովսես Խորենացու համար զուտ գեղարվեստական համեմունքներ են: Մովսես Խորենացին դրանց այդպես էլ վերաբերվել է՝ որպես պատմական անցքերի շուրջ հյուսված

¹¹ Տե՛ս Մովսես Խորենացի, Պատմութիւն Հայոց, գք. Բ., գլ. ԼԵ.-Կ., ԿԱ.-ԿԴ., էջ 161–199, աշխ.՝ 1990, էջ 103–128:

երգ-պատումների եւ առասպելաբանությունների¹², իսկ սկզբնաղբյուր որպես՝ նշում է Ողյումպ քուրմին եւ պարսից մատյանները: Օգտագործած սկզբնաղբյուրները նշելու առումով Մովսես Խորենացին զարմանալիորեն ճշտապահ է, իսկ երեւոյթն ընդհանրապես քիչ է հանդիպում: Երկրորդ գրքի ԿԶ. գլխում պատմիչը պարզաբանում է, որ մեհենական պատմություններին, ուրեմն եւ Ողյումպ քուրմին, ծանոթ է Բարդաժան Եդեսացու միջոցով, որը գալով Հայաստան եւ հետեւորդներ չգտնելով՝ հաստատվել է Անի ամրոցում (Դարանաղի գավառում), կարդացել մեհենական մատյանները, որոնց մեջ՝ հայոց թագավորների պատմությունները, եւ բոլորը թարգմանել ասորերեն, որը հետո թարգմանվել է հունարեն: Մեհենական պատմություններին Բարդաժանն ավելացրել է իր ժամանակի անցքերը¹³: Բարդաժանից օգտվելով՝ Մովսես Խորենացին պատմում է մինչեւ հայոց Վաղարշ Բ. թագավորի ժամանակը ներառյալ եւ նրա որդու՝ Խոսրովի գահակալության սկիզբը, այսինքն՝ մինչեւ Գ. դարասկիզբ:

Ասորական գրականության հիմնադիր համարվող Բարդաժանը¹⁴ (154—222 թթ.) ժամանակակիցն է Արտաշեսի գահակալած Յ-րդ որդու՝ Տիգրան Սոհեմոսի եւ վերջինիս որդի Վաղարշ Բ.-ի, իսկ մինչ այդ նրա բերած փաստական նյութը մեհենական մատյաններից է: Արտաշես թագավորի պարագայում գործ ունենք Մովսես Խորենացու օգտագործած այնպիսի սկզբնաղբյուրի հետ, որը կարելի է որակել որպես հայոց թագավորների գործերի Հայաստանում գրված արձանագրություն, որը պահվել է Դարանաղյաց Անիում, որտեղ հայոց թագավորների հանգստարանն էր¹⁵: Մեհենական մատյաններից գրի առածն ասորերեն փոխադրելիս Բարդաժանը, եթե ինչ-որ բան շփոթած էլ լինի, համենայն դեպս ոչ այնքան, որ շփոթեր իրեն ժամանակակից հայոց երկու թագավորներին ու նրանց հորն ու պապին, առավել եւս՝ երբ ինքը տեւական ժամանակ գտնվել է Հայաստանում¹⁶:

¹² Տես անդ, գր. Բ., գլ. ԽԸ., Ծ., էջ 176, 178—179, աշխ.՝ 1990, էջ 112, 115—116:

¹³ Տես անդ, գր. Բ., գլ. ԿԶ., էջ 201—202, աշխ.՝ 1990, էջ 130:

¹⁴ Հիպոլիտոս Բոստրացին Բարդաժանին ազգությամբ հայ է համարում, Հուլիանոս Աֆրիկանոսը՝ պարթև, Պորփյուրը՝ բաբելացի, Եւսեբիոս Կեսարացին, Եպիփանը եւ Հերոնիմոսը՝ միջագետքցի. տես Հ. ՄԵԼՔՈՆՅԱՆ, Հայ-ասորական հարաբերությունների պատմությունից, Երեւան, 1970, էջ 151:

¹⁵ Տես ՓԱՎՍՏՈՍ ԲՈՒՋԱՆԳ, Հայոց պատմություն, դպր. Դ., գլ. ԻԴ., Երեւան, 1987, էջ 222 (գրբ.), 223 (աշխրհբ.):

¹⁶ Բարդաժանի մասին, որպես Մովսես Խորենացու ունեցած գրավոր աղբյուրի, տես Հ. ՄԵԼՔՈՆՅԱՆ, Հայ-ասորական հարաբերությունների պատմությունից, էջ 151—157:

Արտաշես թագավորի մահվան ու թաղման դրվագները Մովսես Խորենացին նկարագրում է համաձայն Արիստոն Փեղղացու (Փելլա/Փեղղա՝ քաղաք Իսրայելում), որը գրել է Ադրիանոս կայսեր ժամանակ (117—138 թթ.) բռնկված Բարքոբայի (Բար-Կոխբա) ապստամբության (132—135 թթ.) մասին: Աշխատությունը չի պահպանվել, բայց ինչպես Մովսես Խորենացին է փոխառել այդ երկից, Արիստոնն իբրեւ ականատես է նկարագրել Մարանդում¹⁷ Արտաշեսի հիվանդանալու, մահվան ու թաղման մանրամասները՝ իբրեւ քարտուղար գտնվելով հայոց թագավորի մոտ¹⁸:

Արիստոն Փեղղացին քրիստոնյա հրեա էր, գրել է նաեւ «Յասոնի բանավեճը Պապիսկի հետ» ջատագովական գործը¹⁹, որից պատահիկներ են պահպանվել, սակայն առաջին դարերում այն հայտնի է եղել եկեղեցական հայրերին: Բացարձակապես անհայտ են Արիստոնի կյանքի հանգամանքները՝ բացի Մովսես Խորենացու այս տեղեկությունից, թե քարտուղար է եղել Արտաշեսի մոտ եւ նկարագրել նրա մահն ու հուղարկավորությունը:

Այն, որ Արիստոն Փեղղացին Արտաշեսի մոտ է եղել 128 թվականին (Արտաշեսի մահվան տարին է), այսինքն՝ Բարքոբայի ապստամբությունից մի քանի տարի առաջ, չի հակասում դեպքերի ընթացքին: 66—70 թթ. հրեական առաջին ապստամբությունից եւ Երուսաղեմի տաճարի ավերումից հետո հրեական հուզումները երբեք չեն դադարել: Տրայանոսի վերջին տարիներին (115—117 թթ.) հրեական սփյուռքում բռնկված ապստամբությունը ճնշվեց, բայց հաջորդ՝ Ադրիանոս կայսեր շրջանում Պաղեստինում նախապատրաստվում էր նոր ընդվզում: Մինչ 132 թ., երբ սկսվել է ապստամբությունը, հրեաները զենք էին հայթայթել, քարայրներում անցումներ փորել, ջոկատներ կազմել: Ապստամբությանը չեն միացել քրիստոնյա հրեաները: Նրանք դեմ են եղել ոչ միայն Բարքոբայի գլխավորած շարժմանը, այլեւ ապստամբության գաղափարին

¹⁷ Մարանդը գտնվում էր Վասպուրական նահանգում՝ Ուրմիա լճից հյուսիս-արեւելք, նաեւ՝ այնտեղ համանուն քաղաք եւ դաշտավայր:

¹⁸ Տե՛ս Մովսէս Խորենացի, Պատմութիւն Հայոց, գք. Բ., գլ. Կ., 1913, էջ 189—190, աշխ.՝ 1990, էջ 123: Արիստոն Փեղղացուն եւ հրեական ապստամբության վերաբերյալ նրա գործն ավելի սեղմ ներկայացնում է նաեւ Նեսեփոս Կեսարացին (տե՛ս ՆԵՍԵՐՈՍ ԿԵՍԱՐԱՑԻ, Պատմութիւն Եկեղեցւոյ, դպր. Դ., 6, Վենետիկ, 1877, էջ 245. հմմտ. Евсевий Кесарийский, Церковная история, IV, 6, 1—4, СПб, 2013, էջ 169—170):

¹⁹ Այս երկում քրիստոնեությունը ընդունած հրեա Յասոնն ալեքսանդրացի հրեա Պապիսկին բացատրում է, որ Հին Ուխտն ու մարգարեները, երբ խոսում են Մեսիայի մասին, խոսում են Հիսուս Քրիստոսի մասին:

ընդհանրապես եւ հրեական միջավայրից օտարվել են ու ճնշումների ենթարկվել²⁰։ Հետեւաբար՝ եթե քրիստոնյա Արիստոն Փեղղացին գրել է Բարքոբայի ապստամբության մասին, պարտադիր չէ հասկանալ, որ նա հայրենիքից հեռացել եւ Հայաստան է եկել հատկապես 132–135 թթ. եւ ոչ ավելի վաղ, երբ նախապատրաստվում էր ապստամբությունը։ Հրեական առաջին ապստամբությունից առաջ հատկապես Փելլա քաղաք էին գաղթել Նրոնաղեմի քրիստոնյաները²¹, եւ պատահական չէ, որ Փեղղացի եւ քրիստոնյա հրեա Արիստոնը բացասական վերաբերմունքով է հիշել Բարքոբային ու նրա գլխավորած ապստամբությունը, ինչպես եւ երեւում է Արիստոնի գործից օգտված Մովսես Խորենացու երկում։ Պատմիչն ասում է, որ ապստամբությունը տարածվել է նաեւ Ասորիքում, Միջագետքում, Պարսքում։ Այս տարածքներում սփռված էին հրեական համայնքներ, որոնք, փաստորեն, արձագանքել են ապստամբությանը։ Մովսես Խորենացու հաղորդածն այս կերպ պետք է հասկանալ, իսկ մտքի շարունակությունը, որ հրաժարվեցին հարկ տալ հռոմեացիներին, պետք է ուղղել՝ եւ հռոմեացիներին, եւ պարթեւներին։ Նման լայն արձագանքը հարազատ է ոգուն մի ապստամբության, որի առաջնորդը հանդես էր գալիս հրեաների փրկչի անունով։

Մովսես Խորենացին, այսպիսով, հստակ չի հաղորդում, թե Արիստոն Փեղղացին երբ է եկել Հայաստան։ Վերջինիս միջոցով համառոտ պատմելով Բարքոբայի ապստամբության մասին՝ պատմիչն անցնում է նոր մտքի՝ ասելով, որ այդ ժամանակներում Ադրիանոս կայսրը զորք ուղարկեց Ասորեստանի կողմերը եւ հայոց թագավոր Արտաշեսին հանձնարարեց արշավել դեպի Պարսկաստան²²։ «Այս ժամանակներում» ասվածը պետք է ընկալել ավելի ընդարձակ, քան ապստամբության՝ այսօր ընդունված 132–135 թվականները, համենայն դեպս 5 տարի ավելի վաղ հասկանալն անհնար չէ, երբ նկատի ենք ունենում վերոնշյալ հրեական իրողությունները։

²⁰ Տե՛ս «Еврейская электронная библиотека», Земля Израиля (Эрец Израэль), Исторический очерк, Период римско-византического владения, I, II *ենթակետեր* (<https://www.eleven.co.il/land-of-israel/history-until-1948/15784/>). «Энциклопедический словарь Ефрона и Брокгауза», т. III, СПб, 1801, էջ 136–137. «Православная энциклопедия», հոդված Бар-Кохба, т. IV, 2002, էջ 338–339։

²¹ Տե՛ս ԵՐՄԵՅՈՍ ԿԵԱՐԱՅԻ, Պատմութիւն Եկեղեցւոյ, դպր. Գ., 5, էջ 153, հմմտ. ЕВСЕВИЙ КЕСАРИЙСКИЙ, Церковная история, III, 5, 3, էջ 118։

²² Մովսես Խորենացու հաղորդածն ավելին է, քան Եւսեբիոս Կեսարացու պատմածը, իսկ Բարքոբայի ապստամբության վերաբերյալ ընդհանրությունները բխում են այն իրողությունից, որ երկուսի աղբյուրն էլ Արիստոնն է, ինչպես եւ իրենք հաղորդում են։

Ուշագրավ է, որ 128—132 թթ. Ադրիանոս կայսրը գտնվել է Ասորիքում, Պաղեստինում եւ Եգիպտոսում: Համաձայն Դիոն Կասիոսի՝ կայսրության տարբեր սահմաններում նրա շրջագայությունների նպատակն էր ռազմական պատրաստակաՆությունն աճեցնելը²³: Պատմիչը «Հռոմեական պատմության» LXIX գրքի 11,1 հատվածում հաղորդում է, որ կայսրը, գտնվելով Հուդայում, գնացել է Եգիպտոս, նույն LXIX գրքի 12,2-ում ասում է, որ Եգիպտոսից նորից եկավ Սիրիա: «Նորից» բառը ցույց է տալիս, որ նա նախապես մտել է Սիրիա՝ Ասորիք, անցել Հուդա, որտեղից՝ Եգիպտոս, եւ կրկին՝ Ասորիք: Նույն գրքի նախորդ՝ 9, 1—6 հատվածում, խոսելով պաշտպանունակության աճեցման ուղղված կայսեր ձեռնարկների մասին, պատմիչը նշում է, որ բոլորի համար վերջինս օրինակ էր՝ քայլելով նրանց հետ «է գերմանական ձյան, էւ եգիպտական արեւի տակ»: Հետեւաբար՝ Եգիպտոսում, պետք է ընդունել նաեւ՝ Ասորիքում եւ Հուդայում, նրա ներկայությունը նախ եւ առաջ ռազմական հետաքրքրություն է ունեցել, իրավիճակի ստուգման, մարտունակության բարձրացման նպատակ: Այս լույսի ներքո համոզիչ է դառնում Մովսես Խորենացու հաղորդածը պարթեւների դեմ պատերազմի մասին, որին, մեր կարծիքով, խանգարել է հայոց թագավորի մահը արշավանքի հենց սկզբում, երբ դեռ հայկական զորքերը չէին անցել Հայաստանի հարավարեւելյան սահմանը: Արտաշեսի մահը եւ հայկական զորքերի հետ քաշվելը իրական չեն դարձրել հաջողությունը, եւ այդ պատճառով այլ աղբյուրներում հիշատակություն չի մնացել Ադրիանոսի այս ծրագրի մասին: Հռոմեացիները, մանավանդ Տրայանոսի արեւելյան արշավանքի անհաջող ավարտից հետո, պիտի խուսափեին հիշել նրա հաջորդի նոր ձեռնարկի մասին, որն սկզբից եւեթ ձախողման է մատնվել:

Քրիստոնյա Արիստոն Փեղղացուն մերձավորների շարքում ընդունելը խոսում է հայոց Արտաշես թագավորի՝ քրիստոնեության հանդեպ ունեցած հանդուրժողության մասին, ինչը հաստատում է նաեւ Ոսկյանց սրբերի վկայաբանությունը՝ պատմելով, որ երբ Ոսկյանք գնացին արքունիք քարոզելու, Արտաշեսը «անտեղի չհամարեց նրանց խոսքերը, բայց անփուլթ գտնվեց»: Ասելով «լսել եմ այդ մասին բազում ուրիշներից, բայց այժմ ազատ չեմ պատերազմներից»՝ նա Սուրբ Ոսկյանց հրավիրել

²³ S^{ku} Кассий Дион, Римская история, LXIX, 11,1 եւ 12,2, LXIX 9, 1—6, СПб, 2011, էջ 134, 136, 131—132:

է այլ ժամանակ այցելել²⁴: Քրիստոնյաների եւ քրիստոնեութեան հանդեպ Արտաշես թագավորի հանդուրժող վերաբերմունքի մասին միմյանցից անկախ աղբյուրների այս համաձայնությունը նույնպէս հավաստիութիւն է հաղորդում տեղեկություններին:

Համաձայն պատմահոր եւ հայկական մատենագրութեան՝ Արտաշեսը հայոց թագավոր Սանատրուկի որդին է, գահակալել է հայոց գահին ապօրինաբար տիրացած Երվանդ թագավորից հետո, որն սպանել էր Սանատրուկի մյուս որդիներին: Միակ փրկվածը մանուկ Արտաշեսն էր, որին դայակը (խնամատարը)՝ Սմբատ Բագրատունին, պահում եւ մեծացնում է՝ թաքցնելով նրան Հայաստանի հարավարեւելյան շրջաններում ու Պարթեւական թագավորութեան սահմաններում, որտեղ իշխում էին հայ Արշակունիներին ազգակից Իրանի Արշակունիները: Վերջիններիս օգնությամբ եւ Սմբատ Բագրատունու զինակցությամբ Արտաշեսը հաղթում է Երվանդին ու գահ բարձրանում: Իշխել է 41 տարի, կնութեան վերջրել ականների արքայադստերը՝ Սաթենիկին, ունեցել Արտավազդ, Տիրան, Տիգրան, Զարեհ, Վրույր, Մաթան անուններով որդիներ, որոնցից ավագը՝ Արտավազդը, հետո Տիրանն ու Տիգրանը հաջորդաբար գահակալել են: Այրել եւ գործել է հռոմեական կայսրեր Դոմետիանոսի (81—96 թթ.), Ներվայի (96—98 թթ.), Տրայանոսի (98—117 թթ.), Ադրիանոսի (117—138 թթ.) ժամանակ:

Մովսէս Խորենացու այս տեղեկությունները լրացնում է Թովմա Արծրունին²⁵՝ այլ աղբյուրներ ունենալով: Ներկայացնելով Արծրունյաց իշխանների ու թագավորների գործերը եւ Վասպուրականի անցուղարձերը՝ նա Ք. հ. Ա. եւ Բ. դարերում հայոց նույն գահակալներին ու պատմական դեպքերն է մատնանշում: Խուրան Արծրունին Աբգար թագավորի²⁶ զորավարներից էր, որը նրա հետ քրիստոնեություն էր ընդունել եւ այդ պատճառով հետագայում հեռացել Սանատրուկ արքայից: Խու-

²⁴ Տէս Հ. Մ. ՎՐԴ. ԱՌԳԵՐԵԱՆ, Լիակատար վարք եւ վկայաբանութիւն սրբոց, հտ. Բ., Վենետիկ, 1811, էջ 124—125:

²⁵ Տէս ԹՈՎՄԱ ԱՐԾՐՈՒՆԻ, Պատմութիւն տանն Արծրունեաց, դպր. Ա., գլ. Զ., Կ. Պոլիս, 1852, էջ 48—52, աշխ.՝ Երեւան, 1978, էջ 68—77:

²⁶ Եղեսիայի Աբգար Ե. թագավորը՝ առաջին գահակալը, որ ընդունել է քրիստոնեությունը: Համաձայն հայ մատենագրութեան՝ նա Տիգրան Մեծի եղբոր որդին է: Խուրան անվանաձեւի փոխարեն Մովսէս Խորենացու գործում Խոսրան է (տէս ՄՈՎՍԵՍ ԽՈՐԵՆԱՅԻ, Պատմութիւն Հայոց, գք. Բ., գլ. ԻԹ., 1913, էջ 147, աշխ.՝ 1990, էջ 94—95): Խուրան-Խոսրան Արծրունուն նաեւ Խոսրով անունով կարող ենք հիշատակված համարել Սուրբ Թադեոս առաքյալի վկայաբանության մեջ՝ Աբգար թագավորի հետ քրիստոնեություն ընդունած (տէս

րանի որդի Վաչեն եւ Խուրանի եղբայր Արշավիրը ապրել ու ծառայել են Պարթեական թագավորությունում եւ Սանատրուկի որդի Արտաշեսի հետ վերադարձել Հայաստան: Վաչեի որդի Սահակը, Արտաշեսի խնամատար Սմբատ Բագրատունու խնդրանքով մինչ այդ ծառայության անցնելով Երվանդ թագավորի մոտ, լուրեր էր հաղորդում Սմբատ Բագրատունուն, երբ վերջինս ջանք էր թափում պահպանել հայոց օրինական թագաժառանգ Արտաշեսին: Երբ Սմբատ իշխանն Արտաշեսի հետ թաքնվում էին Վարազ լեռան վրա, եւ Երվանդը, նրանց փնտրելով, գալիս է Տոսպ գավառ, Սահակն է լուր տալիս վտանգի մասին, եւ նրանք հեռանում են Հեր եւ Զարեանդ: Իշխանության գալով՝ Արտաշեսը Սահակ Արծրունուն պարգևում է Վասպուրականի Աղբակ գավառը: Այս իրողությամբ Արծրունիները Աղձնիքի Սիմ լեռան սահմաններից փոխադրվել են Վանա լճից արեւելք, հաստատվել ու բարգավաճել Վասպուրական նահանգում:

Արտաշես թագավորին Ք. հ. Ա. դարավերջից Բ. դարասկիզբ ժամանակաշրջանում գիտի վրաց տարեգրությունը՝ «Քարթլիս ցխովրեբա»-ն²⁷: Լիովին անկախ հայ մատենագիրներից՝ վրաց տարեգրությունն առանձին մանրամասներ է պատմում, որոնք հակասության մեջ չլինելով հայոց տեղեկությունների հետ՝ լրացնում են դրանք: Վրաց տարեգիրը նույնպես հայտնում է, որ Արտաշեսը (հիշված է Արտաբան, Արտավան, Արտաշան ձևերով) գահակալեց Սմբատի օգնությամբ, հաղթեց եւ սպանեց Երվանդին, հիշատակում է Արտաշեսի Արտավազդ, Զարեհ, Տիգրան որդիներին եւ երեք արշավանք, որ դեպի Հայաստան իրականացրին վրաց արքաներ Ազուկն ու Ազմայերը՝ օգնության կանչելով լեկերի (լեզգիների) եւ օսերի (ալանների) թագավորներին: Վրաց այս գահակալները, ըստ Մ. Բրոսեի, իշխել են Ք. հ. 87–103 թթ.²⁸. նույն ժամանակաշրջանում, ինչ Արտաշեսի համար ներկայացնում են հայոց աղբյուրները: Հստ վրաց աղբյուրի՝ առաջին արշավանքի ժամանակ ներխուժելով հայկական Շիրակ, Վանանդ, Բասեն, Նախիջեւան գավառներ՝ վրաց եւ

ՂԵՐՈՒՐՆԱ ԵՎԵՍԱՅԻ, Թուղթ Արգարու թագավորի հայոց եւ քարոզութիւն սրբոյ Թագէի առաքելոյ, Երուսաղէմ, 1868, էջ 15):

²⁷ Տէս ԶՈՒԱՆՇԷՐ, Համառոտ պատմութիւն վրաց, գլ. Ե., Վենետիկ, 1884, էջ 31–34. «Картлис цховреба», Тбилиси, 2008, էջ 31–32, հմմտ. Л. МРОВЕЛИ, Жизнь Картлийских царей, Москва, 1979, էջ 33–35:

²⁸ Տէս ԶՈՒԱՆՇԷՐ, Համառոտ պատմութիւն վրաց, գլ. Ե., էջ 32. Լ. ՇԱՀԻՆՅԱՆ, Հայաստանը եւ առաջին Արշակունիները, էջ 414, աղ. Դ.:

օսական զորքերն ավարով ու գերիներով փորձել են անցնել Կուր գետը, երբ հայկական զորքով նրանց է հասել Սմբատ Բագրատունին: Նա պահանջել է վերադարձնել գերիներին եւ մերժում ստանալով՝ անցել գետն ու պարտության մատնել հակառակորդին: Վրաց տարեգրությունը հաղորդում է, որ Սմբատը Սամցխեում բերդ է կառուցել եւ զորագունդ դրել այդտեղ: Վրաց եւ օսերի հաջորդ արշավանքն ու ավարառությունը Պարխար լեռների, Տալքի եւ Աշոցքի կողմերում նույնպես ավարտվել են նրանց համար աղետով: Այս անգամ Արտաշես թագավորն է զորքով հետապնդել նրանց եւ հասել մայրաքաղաք Մցխեթ՝ այնտեղ մնալով հինգ ամիս՝ մինչեւ վրաց թագավորները հաշտություն են խնդրել ու հարկատու դարձել: Արտաշեսի մասին այստեղ տարեգիրն ավելացնում է. «... եւ գոռայր ընդդէմ յունաց եւ պարսից», վկայություն, որ հայոց թագավորը շարունակ պատերազմների մեջ էր՝ իր երկիրը պաշտպանելով ոչ միայն վրաց եւ ալանների հարձակումներից²⁹: Այդ պատճառով ազատ զգալով իրենց, պատմում է վրաց տարեգիրը, վրաց եւ օսերի զորքերը կրկին մտնում են Հայաստան: Պատերազմով զբաղված Արտաշես արքան իր Զարեհ որդուն է ուղարկում նրանց դեմ: Յիլխ լճի մոտ Զարեհը գերի է ընկնում եւ պահվում Դարալայում (Դարիալի կիրճը պահող բերդում): Միայն երեք տարի անց Սմբատ Բագրատունին Արտաշեսի Արտավազդ եւ Տիգրան որդիների հետ զորքով մտնում է Վիրք, եւ վրաց թագավորները հաշտություն են խնդրում՝ վերադարձնելով Զարեհին, խոստանում վճարել հարկը եւ պայմանավորվում պատերազմի դեպքում օգնել միմյանց:

Վրաց տարեգրության հիշատակած այս երեք արշավանքներից Մովսես Խորենացուն հայտնի է միայն վերջինը: Երկրորդ գրքի ԾԳ. գլխում նա շատ համառոտ պատմում է վրաց Քարձամ թագավորի հարձակման, Զարեհի գերության եւ ի պատասխան հետեւած հայոց հարձակման մասին, որն իրագործեցին Արտավազդն ու Տիգրանը՝ գերությունից ազատելով իրենց եղբորը: Ուշագրավ է, սակայն, որ պատմիչն ասում է, թե

²⁹ Մովսես Խորենացին պատմում է Արտաշեսի օրոք Դոմետիանոս կայսեր հրամանով Հայաստան ներխուժած հռոմեական զորքի դեմ Այրարատ նահանգի Բասեն գավառում տեղի ունեցած մեծ ճակատամարտի եւ հայոց զորքի ձեռք բերած հաղթանակի մասին (տե՛ս «Պատմություն Հայոց», գք. Բ., գլ. ԾԳ., էջ 184–185, աշխ.՝ 1990, էջ 119–120): Այս տեղեկության հավաստիության մասին տե՛ս Լ. ՇԱՀԻՆՅԱՆ, Հայաստանը եւ առաջին Արշակունիները, էջ 364–367:

Քարձամբ, «ապստամբեցնելով» վրաց երկիրը, գերի վերցրեց Ջարեհին³⁰: Ուսումնասիրողները նկատել են, որ Մովսես Խորենացու աղբյուրին (որը Բարդաժանի միջոցով Ողյումպ քուրմն է) հայտնի է եղել նաեւ վրաց տարեգրքի նկարագրած առնվազն նախորդ արշավանքը, որի արդյունքում վրաց թագավորները Մցխեթ հասած Արտաշեսից հաշտություն են խնդրել եւ հարկատու դարձել: Այս պայմանը խախտելով կամ «ապստամբելով» է Քարձամբ նոր արշավանք ձեռնարկել:

Վրաց տարեգրքի հիշած այս արշավանքներից տարբեր է Ծ. գլխում Մովսես Խորենացու նկարագրած արշավանքը, քանի որ այնտեղ գերի է ընկել ալանների արքայազնը, եւ այն առնվազն 20-ամյակ վաղ է տեղի ունեցել՝ Արտաշեսի գահակալության սկզբում, որից հետո են ծնվել Արտաշեսի ու Սաթենիկի հիշյալ որդիները:

Համաժամանակ իշխած վրաց Ազուկ եւ Ազմայեր թագավորների վերաբերյալ Զվանշերի գործի հայերեն բնագիրը հրատարակող Հ. Աթանաս Թիրաքյանը, հիմնվելով Բրոսեի բացատրության վրա, որ Ազմայեր (այլ դեպքերում՝ Ամզիեր, Արմազել) անունը պետք է հասկանալ Արմազեցի, առաջարկում է վրաց թագավորին Մովսես Խորենացու նշած անունով ճանաչել Քարձամ (Քարթամ) Արմազեցի³¹: Վրաց պատմագիտությանը Քարթամ թագավոր է ճանաչում Ք. հ. 75–106 թթ.³²: Անտեղի չի լինի անդրադառնալ, որ վրաց պատմագիտությունն իրավացիորեն պատճառ չի տեսնում Քարթամ թագավորին եւ հիշյալ դեպքերը տեղափոխելու Քրիստոսից առաջ ժամանակաշրջան, եւ ինչպես նկատել է Լ. Շահինյանը, ստացվել է, որ համաձայն հայ պատմագիտության ընդունած (դասավանդվող) տեսակետի՝ դեպքերը տեղի են ունեցել Ք. ա. Բ. դարում, իսկ ըստ վրաց պատմագիտության՝ մոտ 250 տարի անց՝ Ք. հ. Ա. դարում:

Հայ-վրացական դաշինքը գործել է հետագա տասնամյակներում. հայոց օգնությամբ գահ է բարձրացել վրաց թագավոր Ադմին, նաեւ հայոց օգնությամբ նրա որդին՝ Համազասպը, պատասխան արշավանք է ձեռնարկել օսերի երկիր, որոնք ավարի էին ենթարկել Վրաստանը: Ժամանակ անց Համազասպին, երբ նա հեռացել է իրենց ավանդներից, երես թեքել նաեւ հայոց հետ դաշինքից, վրաց իշխանները մերժել են եւ իրենց

³⁰ Տե՛ս Մովսես Խորենացի, Պատմութիւն Հայոց, գր. Բ., գլ. ԾԳ., 1913, էջ 184, աշխ.՝ 1990, էջ 119:

³¹ Տե՛ս ԶՈՒԱՆՇԵՐ, Համառոտ պատմութիւն վրաց, գլ. Ե., էջ 34, ծանոթ. 2:

³² Տե՛ս Լ. ՇԱՀԻՆՅԱՆ, Հայաստանը եւ առաջին Արշակունիները, էջ 414, աղ. Դ.:

համար թագավոր խնդրել հայոց թագավորի որդի Վրոյնին (կամ՝ Վիրո): Այս հայազգի թագավորին սիրելով ու մեծարելով՝ Վրաստանում կոչել են Րեւ, որ նշանակում է հաղթող, ինչպես բացատրում է վրաց տարեգիրքը³³: Ուշագրավ է, որ վրաց աղբյուրը հիշատակում է հայոց արքունիքում կիրառվող մի անուն, որը հիշված է Ոսկյանց եւ Սուքիասյանց վկայաբանություններում: Վիրո-Րեւը Վրաստանում իշխել է Ք. հ. 186—213 թթ. կամ 189—216 թթ.: Նրա մասին վրաց պատմագիր Դավիդ Բագրատիոնին (ԺԸ. դ.) նշում է, որ հայոց Տիգրան թագավորի կրտսեր որդին էր³⁴, ինչպես, հավանաբար, նա գրանցված է տեսել «Քարթլիս ցխովրեբա»-ի իր օրինակում, որի հայերեն թարգմանության մեջ (Ջուանշեր, «Համառոտ պատմություն վրաց») հայոց թագավորի անունը չկա: Վրաց տարեգույնը, այսպիսով, 180-ականներին իշխող հայոց թագավորին նույնպես հիշատակում է Տիգրան անունով (եւ ոչ Սոհեմոս, ինչպես նրան կոչել էին օտարության մեջ): Ուշագրավ է նաեւ Տիգրանի որդի եւ Վրաստանի թագավոր Վիրոյին տրված Րեւ պատվանունը եւ անվան բացատրությունը՝ հաղթող: Հր. Աճառյանի թեական կարծիքով՝ Րեւ-ը (Ռեւ) հայերեն «արեւ» բառն է՝ առանց «ա»-ի³⁵: Արեւը միշտ ցրում է խավարը, միշտ հաղթող է: Արեւի, լուսի նույն հասկացությունից է Պերոզ անունը, որը, իբրեւ անձնանուն բացատրելով հաղթող իմաստով, ինչպես ավանդված է պատմագիրների կողմից³⁶, Հր. Աճառյանն իբրեւ բառ բացատրում է շղարշ, վարշամակ, գոտի նշանակությամբ³⁷, այսինքն՝ մի բան, որը պարուրում, պատում է: Այս ընկալումը պիտի արժարժված լինի արեւին պարուրող լուսի, փառ(ք)ի նմանությունից, ինչպես հուշում է «փարազուն» բառը, որը «բերող», «բխրող», «ֆխրող» տարբերակների հետ Հր. Աճառյանը բացատրում է՝ հզոր, քաջ, հաղթող, նաեւ՝ փառավոր, ճոխ՝ ըստ ՆԲՀԼ-ի³⁸: Պերոզ անունը նույն «փարազուն» բառն է՝ far (պահլ.՝ փառք), farra (պարս.՝ լույս) հիմքով, որը նույն կերպ է հնչում նաեւ հայերենում՝

³³ Տե՛ս ՋՈՒԱՆՇԵՐ, Համառոտ պատմություն վրաց, գլ. եւ., էջ 32, 37—38. «Картлис цховреба», էջ 36—37. հմմտ. Л. Мровели, Жизнь Картлийских царей, էջ 35—36: Ըստ Բրոսեի՝ Ադմին գահակալել է 129—132 թթ., ըստ արդի պատմագիտության՝ Գաղամ՝ 132—135 թթ., Համազասպը, ըստ Բրոսեի, 132—146 թթ., ըստ արդի պատմագիտության՝ 185—189 թթ., Վիրո-Րեւը, ըստ Բրոսեի, 186—213 թթ., ըստ արդի պատմագիտության՝ 189—216 թթ.:

³⁴ Տե՛ս ДАВИД БАГРАТИОНИ, История Грузии, §57, Тбилиси, 1971:

³⁵ Տե՛ս Հր. ԱՃԱՌԵԱՆ, Հայոց անձնանունների բառարան, հտ. Դ., էջ 317:

³⁶ Տե՛ս անդ, էջ 262:

³⁷ Տե՛ս Հր. ԱՃԱՌԵԱՆ, Հայերէն արմատական բառարան, հտ. Դ., Երեւան, 1979, էջ 76:

³⁸ Տե՛ս անդ, էջ 485. ՆԲՀԼ, հտ. Բ., Վենետիկ, 1837, էջ 936:

«փառ»: Այն նախ ընկալվում է իբրեւ լույս, հետո՝ երկրորդական իմաստներով՝ անիվ, անիվի թեւ (նմանութեամբ արեւի եւ նրանից բխող ճառագայթի), փետուր, զգեստ, թաղանթ (նմանութեամբ լույսով պարուրման) կամ պարզապէս՝ ծածկել, պատել (ինչպէս լույսը՝ արեւին)³⁹: Այս անդրադարձը վկայում է, որ գործ ունենք մի երեւոյթի հետ, երբ անունների թարգմանական եւ (կամ) մեկից ավելի անուն ու պատվանուն կրելու պատճառով նույն իշխողը տարբեր աղբյուրներում կարող է հիշատակվել տարբեր կերպ:

Այսպիսով, ըստ ժամանակաշրջանի (Ա.—Բ. դդ. սահմանագիծ), ըստ անձանց, ըստ քաղաքական իրավիճակի՝ վրաց տեղեկութուններն Արտաշեսի, նրա որդիների, Արտաշեսին նախորդած Երվանդի մասին ներդաշնակ են հայկական աղբյուրներին՝ լինելով անկախ վերջիններից, որովհետեւ պատմում են նաեւ արշավանքների մասին, որոնք հայկական աղբյուրներին կամ հայտնի չեն, կամ հայտնի են մասամբ:

Շարունակութունը՝ հաջորդիվ



³⁹ Տէս Հր. ԱՃԱՌԵԱՆ, Հայերէն արմատական բառարան, հտ. Դ., էջ 481–482: